

UMWÈPELÈ PA MÙLIYÔ MUJIMÀ



Twasakidila, mwaneetu. Twasakidila, Mwaneetu
Shakarian.

Kabidi mwoyi wenu awu mu dinda emu, nwênù balunda baanyi. Ncya bushuwa ne mbîmpè bwa kusanganyibwa cyakabidi muneemu mu Los Angeles mu dinda emu, kumpala kwa mpungilu munene ewu, ne kwa disangisha diikalà mwa kwenzeka mu lumingu lùlwalwà elu ku cilaala-beenyi cya Embassy Hotel. Ndi ntekemena ne nênnùmònè nwênù bônso kuntwaku. Ne tudi twètù bônso ne myoyi yizuka bikole bwa kutwilangana ne Mukalenge wetu Yesu, bwa kuMumona kwòkò aku. Yèyè utu mulaye ne Neikalèku, “mwaba wónso wùvwà babidi anyi basatu mwa kusangila,” Yèyè uvwa mwa kwikalapu.

² Ne mêmè ndi mutwishibwe ne ndi mutwilangane Nende mu dinda emu pàngábàndi bibàndilu mwab’ewu bwa kubwela mu dibalaasa edi, pàvwà bantu bônso ne myoyi yizuka, bindile didya dya dinda ne diyisha apu. Ne mbîmpè bwa kwikala badisangishe neenu kaaba aka, ngambila kabidi bateeleji baa ku tudyomba. Kudi bààbùngi menemene mwab’ewu, bàdi. . . Bivwa bikengela bwa mêmè kutuulukila mu cisàsà cya mwinshi cidi cìlonda, bwa kwakulaku ne ndambu wa bantu. Ki mêmè kumona malomba àbùngi menemene, màsaamà a myoyi, ne matakanyika mashiileshiilangane a mibidi yabo, ne twètù tudi kaaba aka mpindyewu bwa kusambidila babeedi ne beena ntatu.

³ Ndi mwenze anu mfika ku lusongo lwa bibàndilu. . . Ndi munkaci mwa kutangila muntu mukalanga wa kale awu mpindyewu. Ùvwa mulwe kùndi, wamba ne: “Mwaneetu Branham, kukaadi bidimu. . .” Kwambaye ne ùvwa ne disaamà dya mwoyi dibi be divwaye. . . kwelabo meeji ne ùvwa mwa kufwa. Nenku mêmè kumusambidila, ki ngàsà wa Nzambi kumwondopaye. Nenku’s ki yèyè ewu mu dinda emu, ne bidimu mu makumi mwandamukulu, mwikalè anu ucyonkomoka. Pa nanku aci’s cidi citufikisha ku dipeta ditekemena dipyadipya.

⁴ Nenku mpindyewu ncya bushuwa ne ndi ndomba masambila a cisamba mu myaba yidi cisanji cifika, ne apa kabidi. Paanyima paa mêmè muumuke mu disangisha edi, nyaaya ku Mputu, nkabwela mu Afrika ne mu nyungulukilu amu, ngenda ngenza masangisha. Nenku nyaayaku bilondeshile cikeena-kumona kampanda, pa nanku neciikalè disangisha dinene kuntwaku, mùndi mutwishibwe. Ne ndi mudyùmwè kukaadi bidimu ne Mukalenge mmuswe bwa mêmè kwalukila. Mudimu mukese wa bwambi mupwekele, wa didipwekesha udiYe mumpeeshe ewu, ncyèna ngeela meeji ne Yèyè ukaadi mujikije anu menemene naawu to, kwine kuntwaku. Bivwa bimweneka anu bu ne kuvwa

kufwanyine kwikala musuuka kampanda mu mwaba kampanda wùndì mufwanyine kukwata mu bukondo bwa Evanjeeliyo, budiYe mumpeeshe bwa kuloba naabu bantu, mu mushindu wa dyondopa dya kùdì Nzambi, nsambidila babeedi. Ne ncyá bushuwa ne ndi ndombaku masambila enu, ne enu nwènù bàdì apa aba ne a kùdì bateeleji bàdì mu myaba yìdì cisanji cyumvwika.

⁵ Ncyèna ne díbà dya kwangata anu cyena-bwalu ne kuyiisha to, ndi mutekemene bwa kwenza nanku paanyima paa ndambu wa tusunsa kaaba aka mu—mu... dibalaasa edi, kadi anu bwa kwakulaku neenu—neenu katanci kakese, bwa twámanyanganakù. Ne kùdì bantu bàdì pambelu mu ditunga, nênsambidilè bàdì kunudi aku abu, dyakamwe, kabidi ne nwènù bàdì apa aba. Nenku ndi cya bushuwa ne disanka dya kutwilanganaku ne balunda bônso bapyabapya aba bântù kacya nciyiku mwanji kutwilangana naabo kwônso eku to, ndi mfuma ku dipetangana naabo anu mu dinda emu.

⁶ Tukaadi bapetepete bikondo bya dicyonkomoka mu masangisha a mu myaba mikwabo. Ncìcitu ntamba kupatuka to, ndi ne mudimu wàbùngì be. Tudi tuditacisha anu bwa kwikala kutwa kupinganga mu njila wa Jeffersonville, Indiana ne Tucson, Arizona, mutukaadi bamwangeele kukaadi ndambu wa bidimu, bilondeshile cikeena-kumona cya Mukalenge, cidì citùtùmekù aci, kabidi, nciyi mumanye ne kùmvwà nya kwine mpenyi to. Ne bààbùngì baa kunudi mwab'ewu, ku Clifton, mvwa mwakuleku neenu matuku makeke kumpala kwa mêmè kuumuka, ne ku disangisha kampanda dya ku Phoenix, pa bidì bitàngilà cikeena-kumona cyàkalwà aci. Ngâkamòna Banjelo mwandamutekete biikàle mu kasumbu.

⁷ Nenku ndi mumanye ne, bwa bateeleji bàdì bàtèèlejilà ku cisanji, pàmwäpa bààbùngì baa kunudi kî mbeena Evanjeeliyo mu kaabujima to, nenku eci cidì mwa kwikala ndambu kunudi bu cya kacyi cyumvwika to. Bwalu, ki mùdici cifwanyine kwikala bwanyi mêmè, kadi kudi... Muntu kana yônso udi mwa kuumvwija cintu kampanda ewu, kabicyena bikengela kabidi bwa kuciitaba ku diitabuuja to. Bintu bitudi katuyi mwa kuumvwija, ki byôbì bidì bikèngelà bwa twètù kwitaba ku diitabuuja. Katwenaku mwa kuumvwija Nzambi to. Muntu nansha umwe kèna mwa kuumvwija Nzambi to. Yèyè mmudishikamine, ne Yèyè mmunene ne wa bukole. Tudi anu—tudi anu tuciitaba cyanaana bwalu tudi bamanye ne Yèyè udiku. Ne díbà adi ku diitabuuja dyetu, mu kuciitaba, Yèyè udi utupingajila dyandamuna, dibatiiza dya Nyuma Mwîmpè.

⁸ Bidi ne, nêngiikalè anu mwa kwakulaku neenu katanci kakese cyanaana, mwab'ewu, pa: Njila “wa Nzambi,” anyi, “mwaba wa dikuukwila.” Nenku mwaba umwepele wùdì mwa kuMukuukwila, mwaba umwepele watuutakeena Yeku neebe, bidì bikengela... Kudi Ekeleeziya umwepele, mwaba umwepele,

musangu umwepele, cisamba cimwepele, mu byônsò abi mmùdi Nzambi utuutakeena. Nenku ndi ntekemena ne Mukalenge udi ubenesha Diyiisha adi mu myoyi yenu mwab'ewu.

⁹ Mpindyewu, mu difika dya ku Tucson, s'bivwa bya pabwabi, bikeena-kumona bìdi byàkulà neebe mu Dîna dya Mukalenge abi. Nansha cimwe cya ku byôbì abi pândîku mwa kuvuluka, ndi mwa kukonka muntu kanà yônsò ní ùdikù mwa kuvuluka musangu, ukaadiYeku mwambe cintu kampanda civwà kaciyi Bulelela. Cidi cyenzeka misangu yônsò anu menemene mushindu udiYe wamba ne necyenzeke awu.

¹⁰ Ne Yêyè, bilondeshile Mifundu, ùdi ne cya kwalukila kutudi mu matuku a ndekeelu aa, mu mudimu wa bwambi wa mushindu ewu. Aci neciikalè paanyima paa dibatiiza dya Nyuma, ne dyakula dya mu myakulu, ne dyondopa dya kùdi Nzambi, ne bikwabo, bintu ebi. Dyashiibwa dya mûsongà dya mukenji wa beena Mpenta ki dyôdi ditudi twamba leelu ewu edi. Mudimu wa bwambi ewu wa Kilisto Yêyè mwine mudifwanyikije munkaci mwa bantu Bende, mwikàle ne bintu anu byôbì bimwebimwe byakenzaYe pavwaYe panu pa buloba abi; mu Mubidi Wende, Mukaji-musela, udi citupa Cyende awu, wenza bintu bimwebimwe abi, bu Mubaki ne Mukajende wa nzubu, anyi Mfumu ne Mukalenge-mukaji, kumpala menemene kwa mushingà wa Dibaka.

¹¹ Lumingu elu, bu Mukalenge mwa kwanyisha, ndi njinga kwakula ndambu pa cyôci aci, mu kampanye keetu emu, ku—ku cilaala-beenyi cya Embassy Hotel eku, ne mu mushindu kampanda wa kumanyanganaku mu wanyi paanyi mushindu wa mudipwekeshe wa kucyenza ewu. Cikondo ne—ne dîbà bitudi ne mwoyi ebi, muntu yêyè kayi mumanye ne kwa kuyiila nkwêpi, cya dyanza ncinyi anyi mmushindu kaayi wa kukudimuka, wêwè—wêwè kucyena wenda kabidi ku diitabuujja to; udi ubûka, udi wêwè anu udicinkila. Ne *kudicinkila* kudi anu—anu “nkuya kumpala kuyi ne dyanyisha dya bukookeshi to.” Pa nanku patwikalà katuyi ne dyanyisha dilelela dya bukookeshi dya kumanya cyàkambà Nzambi ne civwa mwa kwenzeka mu dîbà edi to, mmunyi mutwakungamanganaku ne dîbà edi? Kadi pàabi bidi bikengela anu tukungamangane naadi, bamanye, ku diitabuujja mu Dîyi Dyende, bintu bìdi ne cya kwikala munkaci mwa kwenzeka mpindyewu, ne ngiikadilu udi matunga asanganyiibwa, ngiikadilu udi bantu basanganyiibwa, ngiikadilu udi ekeleeziya usanganyiibwa, ne bikwabo.

¹² Bidi bikengela bwa twêtù kumanya aci, ne pasiishe mutudi mwa kupatuka ne kukungamangana naaci. Wêwè kuyi mumanye mushindu wa kwenza nanku to, udi wêwè anu—anu cituvwa tubiikila pa ciibidilu mu mushindu kampanda ne, ku mpuukapuuka; wela anu cidya ubwelamu, mutekemene ne neciikalè apa, mutekemene *cikampanda* ne mutekemene *cikansanga*, ne bya ne “necyenzeke anyi?” abi. Kadi Nzambi kî

mmuswe bwa twètù kwenza nanku nansha. Yêyè mmuswe bwa twètù kumanya cidiYe mwambe bwa dituku edi, ne pathiishe kutwilangana naaci ku diitabuuja, bwalu Yêyè mmwambe ne neciikalè mushindu awu. Dìbà adi tudi—tudi tumanya ne wêwè udi Bulelela dìbà adi, bwalu kwèna ne dìyì dya muntu kampanda mukwabo bwa cyôci aci to; udi wêwè ne Dìyì Dyende dya citudi ne cya kwenza. Nenku tudi batekemene ne Taatù wetu wa mu Dyulu neatupeesheci mu—mu lumingu emu.

¹³ Mpindyewu, ndi muumvwe bintacishe mûndì mukosoloje, cîmvwà ngamba katanci aka aci, pa dilwa dya ku Tucson. Ne mvwa ndyambidila, mêmè mwine ne, civwa ndekeelu wa mwoyi wanyi. Mvwa ndyambidila ne muntu nansha umwe kavwaku mufwanyine kutwala cikûminà cya ngiikadilu awu civwà cyenzeke mu cikeena-kumona cya mu dinda adi aci, pabwîpi ne dìbà dikumi kwanyi kumbelu, bya mufwanyineku kushaala ne mwoyi paanyima paa cyôci aci to. Mona's, mêmè kulwa ku Tucson, mwikàle ndilongolola ne mwanaanyi wa balume, bwa mukajaanyi ne—ne bânà kuyabo nende paanyima paa mêmè mumane kufwa, bwalu mvwa ndyambidila ne civwa ndekeelu wanyi. Ne mêmè, mu Phoenix ne mu àbûngì a ku masangisha kumpala kwa kwenzekaci, nkaavwa munwâmbile menemene anu muvwaci mwa kwenzeka.

¹⁴ Ee, ndambu wa ngondo paanyima paa cyôci aci, mvwa mubànde mu Sabino Canyon mu dinda kampanda, kwòkò nku nord wa Tucson. Mvwa mubàndekù bwa kusambila. Nenku pâmvwà munkaci mwa kusambila apu, mvwa mwele cyanza cyanyi muulu mu lupeepele, ngamba ne: “Taatu, ndi nKulomba bwa Wêwè kunkwacishaku mu mushindu kampanda, bwa umpeesheku makanda, bwa dìbà dîndi nkungamangana naadi mpindyewu edi. Nenku piikalàbi ne mudimu wanyi wajiki pa buloba apa, dìbà adi ndi ne cya kulwa Kûdì. Kadi kî mbwena kwamba ne ndi nyingalala bwa dilwa dyanyì Kûdì to, kadi ndi mumanye ne Wêwè neukube dikù dyanyi. Kadi ndi—ndi ndomba anu makanda cyanaana bwa dìbà edi.” Ki cintu kampanda kuntuutaci mu cyanza!

¹⁵ Mpindyewu, nwênù bateelejidi baa ku cisanji, cîndì mwambe eci cidi mwa kuumvwika cya pabwaci, kadi mbulelela. Ne Nzambi ngudi Mulumbulwishi wanyi.

¹⁶ Mêmè kutangila mu cyanza cyanyi amu, muvwa mwele wa mvita, mwikàle ne cikûbi lwà kumutu kwa citupa cya cilabì aku. Ne cilabì cyôci ciine civwa cilema masàngà, ne civwa mu mushindu kampanda cimweka anu bu cikûbi cya ngòlò cibwikile citupa cya cilabì aci. Ne keele kòkò—kòkò kiine kavwa mu mushindu kampanda anu bu kàvwà kèngelelà, kaa, cintu kampanda cya cifwanangane ne cyamu cya cishilè cya cibàlakana anyi cintu kampanda cya cibalakana mu muunya.

¹⁷ Mpindyewu, tukààvwa dîbà bu dikumi anyi dikumi ne dimwe jaajaaja mu dinda amu, lwà ku lusongo lwa mukuna aku. Nudi mwa kudifwanyikijila mùdì muntu wetu ewu (mùndì ndyumvwa ne ndi ne meeji aanyi mu ôwò emu) mufwanyine kudyumvwa mwimane kuntwaku ne mwele wa mvita kawuyi ne kudiwu mufumine to, bantu biikàle basanganyiibwa mu ntanta wa kilomeeta ne kilomeeta, mukwate ciine aci mu cyanza cyebe. Ngákawùm vwa, mémè kwangata ne kukùpa mwele awu ngutuma kumpala ngutuma paanyima, ne, mona's, s'wuvwa mmwele wa mvita.

¹⁸ Ki mémè kukenzakana. Mémè kwamba ne: “Ee, mpindyewu, aci ncifwanyineku kwenzeka mushindu kaayi? S'ki mémè ewu mwimane kaaba aka, anu apa, kaaba aka, ne kakuyiku muntu nansha umwe mu nyungulukilu emu mu ntanta wa kilomeeta ne kilomeeta, kadi aci ncifumine penyi?” Ki mémè kwamba ne: “Ee, ndi—ndi ncinka ne pàmwápa ùdì—ùdì m'Mukalenge munkaci mwa kungambila ne nndekeelu wanyi.”

Ki Dîyi kampanda kwakula dyamba ne: “Ewu m'Mwele wa mvita wa Mukalenge.”

¹⁹ Ki mémè kudyambidila ne: “Ee, mwele wa mvita, dîbà adi's ngwa . . . byenze bu mfumu kampanda's, bwa kulwangana mvita ya pa kabalu,” nudi bamanye's, mùvwábo ne ciibidilu cya kubyenza mu Angleterre ne mu myaba mishiileshiilangane amu. Mémè kudyambidila ne: “Ki kiipacila kaawu nkòkò aku, kulwangana mvita ya pa kabalu.” Ki mémè kudyambidila ne: “Ee, pàmwápa ndi ne cya kutentekela bantu byanza, anyi . . .” Mvwa ne mishindu yònsò ya . . . Meeji a buntu adi mwa kupeta cibwejàkàji cya menemene, nudi bamanye nanku. Kùyi mumanye to. Etu meeji adi ne mikalu; Ende Yèyè kaena ne mikalu to. Pa nanku, ne pàncìvwà mwaba awu apu, wòwò . . . Pashiishe wòwò kunguumuka mu cyanza amu ne ncyakamanya ne wákaya penyi to, mujimine anu nanku. Mona's, muntu yèyè kayi ùmvwakù nansha kakese bintu bya nyuma to, wèwè's—wèwè's uvwa mufwanyine kupaala anu mushindu awu. Uvwa mufwanyine kushaala mwimane mwaba awu, munkaci mwa kudikonka cidi cyenzeke.

²⁰ Ki Yèyè kwamba ne: “Cikeena-kumona aci kî nndekeelu webe nansha. Cidi bwa mudimu webe wa bwambi. Mwele wa mvita awu n'Dîyi. Bitampi Mwandamutekete nebikangudiibwe, maalu masokoka a . . .”

²¹ Ne pashiishe mbingu yibidi paanyima paa cyôcì aci, anyi ngondo yibidi's we, eyowa, paanyima paa cyôcì aci, mvwa nsanganyiibwa pa mukuna ne musumbà wa balunda paakenzekaci apu. Banjelo Mwandamutekete, bamweneke bitooke tòò anu munudi biimane mwab'ewu amu, baakalwa benda bapweka ne kavumu bafumina mu Dyulu. Mbwebwe mu mikuna yivwa yibunguluka too ne kwinsi kwa tukuna,

ne—ne bantu bàvwà biimane mwaba awu abu bavwa munkaci mwa kwela mbila mikole ne batungunuke, nudi bamanye's, ne lupwishi lubuuka myaba yònsò. Nenku paakenzekabi apu, Yéyè kwamba ne: “Alukila kwebe kumbelu. Mpindyewu nebyenzeke ne, Mwanjelo yònsò neikalè cimwe cya ku bitampi cya ku Bitampi Mwandamutekete.”

²² Biine abi, bidi pa mukaba wa mēyì. Ne mukanda awu newupatuke abidi adi panshi aa, bu mùdìbi ne ùdì mpindyewu munkaci mwa kulongolodiibwa mwakulu. Anu munudi bamanye, wanyi mwakulu kawena mwímpè menemene to, ne bantu kî mbafwanyineku. . . Bidi bikengela anu nwènù biikàle bantu bàdì bannange ne bamanye mwa kungumvwaku pa bidì bitàngilà wanyi mwakulu. Kadi mwena teoloji kampanda ngudi uwundongolwela mwakulu, ne mwikàle umusha byònsò bya—bya. . . Ee, pàmwāpa ngāmbì mwaku udi kawuyi wòwò mwaba awu. Ncyèna nanshà mumanye to. Pa nanku, ngūmvù muntu useka, pa nanku ndi ngeela meeji ne “kulongolola mwakulu” aku ki cìvwà kaciyi mu cyôcì. Kadi anu bu mwena Hollande awu, nungangacilaayi ku bìndì njinga kwamba kadi kî nku bìndì ngamba to, pàmwāpa.

²³ Nenku nkushaale anu tusunsa tusatu mpindyewu, mudibo bangambile, too ne ku dyoya dya ndongamu.

²⁴ Mpindyewu, nwènù bananga bàdì basanganyiibwa mu myaba yidì cisanji cyumvwika, ne nwènù bàdì bàsaamà ne bàdì mu lukengelu lwa bintu mwab'ewu mu bateeleji emu, swayiku nutentekelangane byanza muntu ne mukwende patudi munkaci mwa kwamba mwaku wa disambila ewu bwa babeedi apa. Mpindyewu, mudimu Wende wa ndekeelu mutuma naawu Ekeleeziya, Yesu mmwambe ne: “Bimanyinu ebi nebifile bàdì biitabuuja.” “Bàdì,” bàdì biitabuuja! “Bôbò batentekete babeedi byanza, babeedi nebasangale.”

²⁵ Taatù wa mu Dyulu munanga, twètù tudi bu mùdì bânà batekete leelu ewu, tudi tutumikila cyùdì Wèwè mwambe bwa kwenza aci. Nyewu tutenteka byanza pa malomba ónsò a ku telefone aa. Wèwè ngudi mubamone mu ditunga mwamwa, mùdìbo mu lukengelu, biikàle bàsaamà. Wèwè udi umona bàdì mwab'ewu mu lukengelu, biikàle bàsaama. Ne tudi tubalambula Kùdì, Nzambi munanga, ne diitabuuja edì mu Dìyì Dyebe dyùdì Wèwè mwambe ne: “Bimanyinu ebi nebifile bàdì biitabuuja. Bôbò batentekete babeedi byanza, babeedi nebasangale.” Enzaku nanku, Mukalenge, mu Dìnà dya Yesu Kilisto. Amen. [Katupa kaa mukaba wa mēyì munda mutupu—Muf.]

[Mwaneetu Branham udi ujikija diyiisha dya kumpala dya ku tudyomba—Muf.]

²⁶ Twasakidila, Mwaneetu Shakarian. Ncya bushuwa ne ndyèsè dinene dya kwalukila cyakabidi ku tudyomba, bwa kwakulaku ne bamwe baa ku balunda beetu mu myaba yidì cisanji cyumvwika mwamwa, pamwe ne bàdì apa aba.

²⁷ Ne ncya bushuwa ne tudi twalabaja dibiikila edi too ne kunudi aku, bwa nwênù kulwa ku cilaala-beenyi cya Embassy Hotel maalaba mu mapingaja, bwa kunusambidila. Ne kacyi anu aci to, kadi nulwaayi ne aba bàdì bangènzàmpèkààtù ne bàdì batwe cìmpìngà. Twètù basambidile anu babeedi cyanaana, ne tudi tumona cya bushuwa Nzambi wenza bishima binene ku musangu ne ku musangu, kadi aci's ncya cilondele. Cintu cya mushinga nkusungidiibwa, kuujiibwa ne Nyuma wa Nzambi, cìngìkalà mwa kunwambila anu mu tusunsa tukese menemene emu mwab'ewu, ne disankishiibwa dya mutùdì ne cya kuujiibwa ne Nyuma wa Nzambi.

²⁸ Kadi dyondopa dya kùdì Nzambi ditu pa ciibidilu dikoka ntema ya bantu, ne dibafikisha mu Bwikadi bwa Nzambi. Pàdì Nzambi wenza cintu kampanda cìdìbo—cìdìbo bamanye ne cidi cyumvwik- . . . ee, kacyena cyumvwika to. Katwena mwa kuleeja ne cyumvwilu cya buumuntù mùdìdì dyenzeka to. Nzambi ngudi udyenza mu mushindu munene Wende Yèyè mwine. Dìbà adi aci cidi cikoka ntema ya bantu, bwa kumanya ne kudi Bwikadi bwa Bukole kampanda mwaba kampanda, bùdì mwa kwenza cintu kampanda cìdì cipite kule ne kule dyumvwa dya buntu, nenku aci cidi cibafikisha ku ditangila kùdì Mwànà wa mukooko wa Nzambi. Ne misangu yònsò, dyondopa dya kùdì Nzambi, bàkaadìku bandondele, ne ndi ngiitabuuja, mèmè mwine ne, bu pankaci paa bya pa lukama makumi asambombo, pàmwàpa, ne makumi mwandamutekete, a mudimu wa bwambi wa Mukalenge wetu, uvwa pa dyondopa dya kùdì Nzambi. Ne Yèyè uvwa wenza aci bwa kukoka bantu. Pashiishe pakaavwabo mwaba awu, kwambaYe ne: “Nwênù kanuyi biitabuuje ne Mèmè ki Yèyè awu to, nenubutuke mu mpekaatu wenu.”

²⁹ Mpindyewu, dyondopa dya kùdì Nzambi ncyenzedi cinene cya dikokangana naaci, bwa kufikisha bantu ku ditangila kùdì Mukalenge Yesu. Nenku Docteur F. F. Bosworth, udi bààbùngì baa kunudi, yèyè uvwa mulunda kudìbo, ne bamumanye, mudimu wende wa bwambi uvwa ne mushinga wàbùngì be kùdìdì mèmè bu mwambi wa kànàkànà. Pàngàakabangà aanyi masangisha, ngàkatwilangana ne Mwaneetu Bosworth. Yèyè uvwa ne ciibidilu cya kwamba ne: “Dyondopa dya kùdì Nzambi,” kàdì nkaadìyi kakese anu ne bujimà bwaku, wàmba ne: “Dyondopa dya kùdì Nzambi ncìshì cyela ku ndobo.” Uvwa wamba ne: “Kwèna wèwè uleeja mushipa ndobo awu to. Udi uwuleeja cìshì, dìbà adi ùdì wipacila cìshì ne ùkapìlka ku ndobo.” Pa nanku ki cyòcì aci citudi tuteeta kwenza. Awu ki wetu. . . tudi. . . Kiipacila keetu nkaa kufikisha bantu kùdì Mukalenge wetu Yesu Kilisto. Ne Yèyè udi umwèumwè

awu makeelela, leelu, too ne kashidi. Pa nanku piikalàbi ne Yèyè uvwa Mwondopi mu matuku akaadi mapite, Yèyè udi Mwondopi leelu.

³⁰ Anu bujaadiki bwa buntangila mêmè mwine kumpala kwa mêmè kusambidila babeedi mwamwa mu myaba yidi cisanji cyumvwika. Kùkaavwa ndambu wa matuku, mvwa musòmbe kuulu kwa mikuna kùvwà cintu kampanda cinene cyenzeke kumpala kwa bânà beetu baa balume dikumi ne bataanu anyi makumi abidi kuntwaku, kùvwà Mwanjelo wa Mukalenge mupweke bikole menemene, ne Bukênkè bunene abu bùbùùka bwenze bu mutooto wa mulanjilanji, bwenda butaayika mu nyungulukilu wa mikuna amu, ne mbwebwe yibuuka too ne mu ntanta wa mètres makumi asambombo ne umwe, anyi mapite apu, mwônso amu, bwenda bukosa nsongo ya mici. Ne mêmè mvwa mwimanyine anu lwà mwinshi mwaBu amu. Ne nkaavwa mumane kubambila kukaavwa ndambu wa ngondo kumpala kwa kwenzekaci ne, Buvwa mwa kwikalaku ne cìvwà mwa kwenzeka aci; bwa kwamba menemene, civwa cyambiibwe dituku divwà didyànjlile adi. Ne balumyana bônso aba munkaci mwa kunyeemena mwinshi mwa mashini ne bikwabo byônso, bateeta bwa kupandukaku. Bôbò kabavwa bamanye cìvwà cyenzeke aci ne ncinyi to. Ki Yèyè kwakula e kwamba cìvwà mwa kwenzeka dyakamwe paanyima.

³¹ Mêmè musòmbe pa dibwe kampanda mwaba awu, anu menemene mwaba uvwaYe mumwenekele awu, mvwa ne—ne mulunda kampanda uvwa neetu, uvwa mufumine ku Minnesota. Beena famiye wende badi kaaba aka mu dinda emu kadi ncyèna mutwishiibwe yèyè ní udi mwa kwikala apa mu cimwe cya ku bisasa. Úvwa n'Donavon Weerts, nsongaalume wa citende wa maalu malenga, Luthérien uvwa ufuma ku difila mwoyi wende kùdì Kilisto ne ku dyujiibwa ne Nyuma. Nsongaalume wa beena Allemagne wa didipwekesha dyàbûngì, wa bidimu biipacila ku makumi asatu, ne dîkù, ne bânà bakese babidi anyi basatu. Yèyè mmumwangale mulwe mu Tucson anu bwa kwikalabo beena mutumba naanyi, mùvwà nkama yisatu anyi yinaayi bamwangale paabo bwa kwikalabo beena mutumba. Pa nanku yèyè. . .

³² Nenku mêmè ndi ne disanka dya kwikalaku ne beena mutumba baa mushindu awu. Bàtu bandonda kuumukila too ne ku Afrike wa ku Sud kwaka, ne myaba yônso mu nyungulukilu amu, anu bwa kwikalabo pabwipi ne bwa kumona. . . naanyi, ne bwa kwikalabo naanyi ne kusankilaku masanka a Mukalenge.

Muntu wa didipwekesha wa mushindu awu, ncivwa anu mwanji kumutabaleela bimpè menemene to.

³³ Mu bushuwa bwa bwalu, bantu bândì mumanye ne muswikakane naabo abu badi menemene anu bu mwaneetu wa balume, mwaneetu wa bakaji. Ntu mbatangila, ne ndyumvwa

ne bu mêmè mwa kwela meeji ne bakaadi balaluka mu njila, ndi mbakokela ku luseke ne nyiikilaku naabo, bwalu ndi mubanange. Tudi baswe kwikala ne mwoyi pamwe mu Butumbi. Ne mîngà misangu, mu masangisha, nutu pàmwäpa nwela meeji ne ndi nnwamba mëyi mashile. Kacyena cifumina ku aci to. Aci kacyena ne mbwalu ncyêna mununange to, kadi cidi bushuwa cifumina munda mwa mwoyi wanyi, bwalu ndi—ndi. . . Cidi ne cya kwikala anu mu njila umwepele. Kudi njila anu umwepele bwa kukwacila Nzambi mudimu, ne mwine awu ngwa. . . Nenku tudi ne cya kushaala mu njila Wende Yêyè, nansha etu meeji miikàle bishi. Njila Wende Yêyè!

³⁴ Ki mêmè kumona ne Donavon, ku lusongo lwa dici dyende dya dyabalume, luvwa lûle pàmwäpa lulwe lunene misangu yisatu kupita bunene bwälù bwa ciibidilu, ne lumweke lukunze kunzuu. Ee, mpindyewu mêmè kudyambidila ne pàmwäpa, mu cipeela mutukaavwa benze ndambu wa matuku amu, ne mwaba utuvwa bapicile, kuvwa pàmwäpa tuntu kampanda twa ntùlu tumuyiile mu dici. Kadi, pângàakakwàtà cyanza cyende, mêmè kujandula ne civwa n'kansere. Pa nanku mêmè kukonka Donavon, kwamba ne: “Donavon, udi ne. . . Ciine aci cikaadi ku dici dyebe aku kukaadi matuku bûngì kaayi?” Anu bwa kubenga kumupapula's, byenze bu ne ncivwa mumanye to. Mêmè kwamba ne: “Ciine aci cikaadi kuntwaku kukaadi matuku bûngì kaayi, Donavon?”

Yêyè ne: “Mwaneetu Branham, ngondo bu yisambombo nanku,” mwakambaye.

Mêmè ne: “Kuvwa mucinteejileku bwa cinyi?”

³⁵ Yêyè ne: “Kaa, mushindu wüntù nkumona ne midimu yàbûngì menemene,” yêyè ne: “ncivwaku muswe bwa—bwa kucyenza to.” Yêyè ne: “Mvwa ndyambidila anu ne pàmwäpa dîngà dituku Mukalenge wadyakukwambilaci.”

Ki mêmè kwamba ne: “Udiku mumanye ne ncinyi anyi?”

Yêyè ne: “Ndi mumanye bilenga cidìci.”

Mêmè ne: “Aci ncyä bushuwa.”

³⁶ Ki dinda dya paakacyabu, kakûyi cikwabo cintu to, anu dikwata dya nsongaalume awu ku cyanza, dinda dya paakacyabu, kakuvwaku nansha kaacibangu ku dici dyende adi to. Civwa ciye anu biyiidi.

³⁷ Misangu yàbûngì tutu tulwijakaja, tukeba bwa kufika ku *cikampanda*, *cikansanga*. Anyi. . . Nwamonu's, cidi ne: “Bimanyinu ebi nebifile mwena kwitabuuja.” Kî ncyambe ne “bôbò basambidile babeedi” to. “Bôbò batentekelè babeedi byanza, babeedi nebasangale!” Tudi ne cya kwikala ne diitabuuja, twètù biine, mu citudi twenza. Eyo.

³⁸ Pa nanku mpindyewu Donavon udi pàmwäpa mwab'ewu. Nenutwilangane nende. Yêyè neikalè kaaba aka, piikalâyè

kayipu mu dinda emu, mu cimwe cya ku bikwabo bisasa abi. Nenutwilangane nende, ne yêyê neamanye bujaadiki ebu.

³⁹ Kadi ncinyanyi cikwabo cîndi mufwanyine kwamba? Ngeela meeji ne Luuka, anyi Yone, umwe wa kudibo, mmwambe ne buloba kî mbufwanyine kwikala ne mwab-...kwangata, kwikala ne mwaba wa diteeka mikanda yîdî mifwanyine kufundiibwa ya bidiYe mwenze munkaci mwa bantu mu matuku a ndekeelu aa to; mùdî babeedi bondopiibwe, baakanwayi basungidiibwe, binunu ne binunu, ne mâsaamâ ne ntatu bya mishindu yônso.

⁴⁰ Mpindyewu, nwênù bàdî mu myaba yîdî cisanji cyumvwika, ne kaaba aka kabidi, nyewu ndi mukwate kaaba aka mpindyewu dyanza dijima dya malomba àdî malwile ku telefone mu dinda emu, yîdî yîdilâ anu kudila kacya anu twâfika kaaba aka. Ne pa nanku tudi...Malomba lukama ne makumi citeema ne asambombo mmalwe mu dinda emu, ku telefone, kacya anu tubwela mwab'ewu. Pa nanku tudisangaayaaku mu disambila mpindyewu pàdî umwe ne umwe...Nansha nwênù biikâlè penyi, mu ditunga mwamwa, tentekelanganaayi byanza muntu ne mukwende, panwikalâ beena kwitabuuja. Kabiya nanku to, tenteka cyanza cyebe pa Bible anyi pa cintu kampanda mwaba awu, patudi tusambila kaaba aka apa ne aku aku.

⁴¹ Taatù wa mu Dyulu munanga, kaabujaadiki kakese kaa Donavon Weerts aka, anu kamwepele cyanaana pa binunu, Mukalenge, kaudi Wêwè ne ngâsà yônso...Ndi ndomba bwa Wêwè kutangijaku mèsù panshi mu myoyi ya bantu ne bàdî apa ne bàdî mu myaba yîdî cisanji cyumvwika. Ne swaku bwa bôbò, muntu ne muntu, bondopiibwe. Swaku bwa mubi awu ùmukè abashiye, ne basungidiibwe ku lutatu lwabo lwônso. Enzaku nanku, Taatù. Mu Dîná dya Yesu Kilisto, Mwan'Ebe, mmutudi tulomba nunku. Amen.

Twasakidila, Mukalenge...[Katupa kaa mukaba wa mêyi munda mutupu—Muf.]

[Mwaneetu Branham udi ujikija diyishi diibîdî dya ku tudyomba—Muf.]

☆☆☆☆☆☆

⁴² Ee, misangu yisatu nyôyi eyi yîndi nsanganyiibwa mwab'ewu mu dinda edi. Ekelekele! Kadi, nudi bamanye's, mbafume ku dyamba ne bidi bikengela bwa twêtù kushiya nzubu ewu munda mutupu mu tusunsa tutwe ku dikumi ne tubidi, dikumi ne tunaayi, anyi cintu kampanda. Ne bàdî ku bulongolodi bwa ndongamu mbambe, biine bàdî mu cisasa cikwabo cyâcya bàba, ne kabeena ne mushindu wa kufila byakudya to. Byakudya byetu twêtù mbilwe kuleepakana's. Tudi ne bitupa bya byakudya byâbûngî, nudi bamanye's. Pa nanku tudi ne disanka dyâbûngî, dyâbûngî dya bu mutûdi bapete dicyonkomoka dinene dya didya dya nyuma edi, dya budî ne bunù, mûndî mufwanyine kudibiikila

nanku, mu dinda emu kaaba aka ne musùmbà wa bantu baa maalu malenga ewu.

⁴³ Ndi muswe bwa—bwa kwambaku ne tudi. . . masangisha aa cyakabidi, maalaba mu mapingaja, ku Embassy kwaka. Mpindyewu, netwikalè mwa kusambidilaku babeedi, ne bindile bwa Nzambi kutwilanganaYe neetu. Nenku ndi mulwe bwa kwelaku cyanyi paanyi citupa, wanyi mudimu wa bwambi, mu dyenza (byònsò bitudi ne mushindu wa kwenza abi) bwa ne disangisha edi dituute dyakalenga. Kaciyi dyakalenga ne bwalu mmasangisha etu twètù to, kadi dyakalenga dya bantu bàdi bàpetà Yesu Kilisto. Ki dyakalenga ndyòdi adi. Masangisha kana ònsò aa, nansha twètù tutumbisha Nzambi bishi, bintu bitudi tuMumona wenza nansha biikàle binene bya bishi, nansha Yèyè mwakule neetu mu Nyuma misangu bùngì munyi, ne bikwabo; anu kwòkò kwikàle cintu kampanda cyenjiibwe, misuuka mibwejiibwe mu Bukalenge!

⁴⁴ Ne Mwaneetu Shakarian wáfumu ku—ku dyamba dìyi dya cya bushuwa anu mpindyewu ewu pa civwaye udyambidila bwa matuku atudi—atudi ne mwoyi aa. Mèmè ndi cya bushuwa ngiitabuujja aci ne mwoyi wanyi wònsò ne, tudi ne mwoyi anu ku cikondo menemene cya nkomenu, anu mu—anu mu mindidimbi ya diloolo menemene. Dìbà dya muulu dikaadi diye bikole. Ne patudi tumona bintu byenzeka mushindu ùdìbi byenzeka leelu ewu ewu, mona's, mbikole bwa kwamba cidi lukòngò lukwabo lufwanyine kutwala. Kukaadi ndambu wa matuku. . .

⁴⁵ Anji ndekelaayi nnunungeejeku kaabwalu kakese kaa ku dici. Mbenze ditaata mu Arizona mujima, mündi musòmbèle amu, dya mu bilongelu byònsò. Mbenze bânà diteeta, kabayi bamanye to, dya byeledi byabo bya meeji. Nudiku mwa kwela meeji ne civwa ncinyi anyi? Bavwa benze ne mu bilongelu bya tulaasa tubàndile ne—ne bya tulaasa tupwekele, muvwa makumi mwandamukulu pa lukama a bânà biikàle basaama dishaadila dya mu byeledi bya meeji. Makumi mwandamutekete pa lukama a kudibo bavwa babandidi baa télévision. Nwamonu's, maalu mabi awu's, mmadifinde e kulwa kutwikila kadi twètù katuyiku. . . S'nudi nudikonka ne cidi cilwa bwa cinyi. Wèwè udi mwa kuumvwa Dìyi dya Nzambi dyèla lubila lukole dicilwisha, kadi nansha nanku's ki twètù—twètù kudisangana bakadijìngile mu bùntàndà bwaci eku.

⁴⁶ Ndekelaayi nnupeesheku kaacintu kaa kànùpapula. Nwamonu's: "Kì mbònsò bàdi bangamba Mèmè ne: 'Mukalenge, Mukalenge,' bààbwelà to; kadi ng'ewu udi wenza diswa dya Taatù Wanyi." Diswa Dyende n'Dìyi Dyende. Tudi mwa kwikala batendeleedi baa menemene, tucicila mu bikondo bya dicyonkomoka, twela mbila, tutupika, mu masangisha aa, citudi. . . Ncyèna—ncyèna muswe kudyulangana to. Kadi ndi ne mudimu wa—wa dyenzela Nzambi, ne mwine mudimu awu ngwa kwikala ne meeji matooke ne kwamba cidiYe Yèyè muswe

bwa mêmè kwamba. Nenu ndi—ndi bulelela ne dyanyisha bwa beena dyâpà dya mu Californie bàdi bantwaleku mu—mu bìndi mutwishiibwe ne mbyôbi. Mêmè nciyi ngamba bilondeshile bintu bìndi mutwishiibwe ne mbyôbi to, ndi mwena lubombo ne mpindyewu ncyêna nansha wa kweyemenyiibwa kunudi to. Ne mêmè nciyi mwa kwikala wa kweyemenyiibwa kunudi, nêngiikalè wa kweyemenyiibwa kùdì Nzambi munyi? bwalu nwênù mbândi mmona ne bândi ngaakula naabo. Mu bushuwa bwa bwalu, mmutùtù twenza kabidi's, twakula ne Nzambi pèndè, kadi, bidi bikengela bwa twêtù kwikala ne meeji matooke a cya bushuwa ne baa kweyemenyiibwa muntu kùdì mukwende. Tudi cya bushuwa mu cikondo cya—cya cibi be, cibi be. Kadi kacya nukaadiku banji kwimana . . .

47 Anji ndekelaayi nnupeesheku anu kaaditaata kakese. “Kì mbônsò bàdi bangamba Mêmè ne: ‘Mukalenge, Mukalenge,’ bààbwelàmu to; kadi ng’ewu udi wenza diswa dya Taatù Wanyi.” Yesu wakamba, pa buloba ne: “Muntu kaakwikala ne mwoyi ku dyâmpà nkaayaadi to, kadi ku Dìyi dyônsò.” Dìyi dyônsò! Kabiya anu bya ku musangu, Dìyi kampanda to, kadi ku Dìyi dyônsò.

48 Divwa n’Dìyi dimwepele dyàkiitabuujiibwà bibi, kùdì wa Nzambi. . . dya mu mikenji ya Nzambi, dyàkakèbà lufu, tunyinyingya, ne bubeedi bwônsò ne dîsaamà dyônsò dya mwoyi, bwa kupanga kwenza kwa Dìyi dya Nzambi, Dìyi dimwepele! Piikalàbi ne yêyè wakabweja bukwabantu mu lufu, bwa dipanga kwenza, kwitabuuja kwa Dìyi dimwepele bibi, “cya bushuwa,” cya bushuwa. Kadi Yêyè’s wakamba ne necyenzeke. Sataana yêyè wakamba ne: “Cya bushuwa kacyakwenzeka to.” Kadi’s cyakenzeka.

49 Pa nanku, bidi bikengela bwa twêtù kulama Dìyi dyônsò dya Nzambi. Kadi piikalà muntu ne mäsamà ônsò aa ne bikwabo bidì bikwate bukwabantu ebi, ku dyumvwija dibi, anyi—anyi ku kwitabuuja bibi Dìyi dimwepele, mmunyi mutwàlukilà ku dipanga kwenza dya Dimwepele, piikalàbi ne ncilombe mushinga wônsò ewu, too ne lufu mene lwa Mwan’Ende?

. . . babiikila mbavule, . . . basungula mbakese.

. . . babiikila mbavule, . . . basungula mbakese.

50 Ncyêna mwa kwangacila cyena-bwalu ku eci to, kadi, bu mutudi katuyi ne dîbà dyàbûngì, kadi anu bwa kunushiilaku kaacintu kampanda.

51 Twelanganaayiku meeji pa. . . Mvwa muye dituku kampanda ne Mwaneetu Shakarian, mwaba uvwabo basopakaja mamiinu a ngombe. Nenu mêmè kumona kùdì—kùdì. . . mu nzubu wa dimpongù mùvwà Mwaneetu Shakarian mukambweje. Nenu bavwa bazabika mu bilume bya ngombe mulume, anu kantu kakese cyanaana. . . bu mùdì kaacyamu kakese, kaci kaa alameeta, ne kwangatamu ndambu wa bilume abi, ne kubyelabo mwinshi mwa lumwenu elu lùvwà lubidyundisha

misangu nkama. Nenku muvwa tuubivuba tukese tutupikamu, mu biine bilume abi. Cibì, twètù tudi bamanye ne civuba citu cifumina kùdì mulume, ne diyi kùdì mukaaji. Ki mêmè kwela mwenji wa mushinda awu lukonko mwaba awu, kwamba ne: “Atu ntunganyi tùdì tutupika nanku awu atu?”

Yèyè ne: “Atu’s—atu’s ntungombe tukese tulume ne tukaji.” Nwamonu anyi?

Mêmè ne: “Mu kaadimata kakese aku anyi?”

Yèyè ne: “Eyowa.”

⁵² Mêmè ne: “Pàmwăpa mu bilume byônsò abi ntufwanyine kwikalamu mùliyô mujima’s?”

Yèyè ne: “Kaa, eyowa’s.” Nwamonu anyi? Mpindyewu, tangilaayaaku ne ntema.

⁵³ Mpindyewu, pàdì cintu cinene eci cyenzeka, kudi diyi dimwepele dindile civuba cimwepele pa mùliyô mujima awu. Ne kakwenaku muntu nansha umwe udi mwa kumanya ne ncivuba kaayi ciine aci, anyi ne ndiyi kaayi adi to. Nwênù baswe kutangila dilediibwa dya mu mubidi emu, didi dyôdì bwalu busokoka kutamba—kutamba dilediibwa dya kùdì virgo. Bwalu, mu bilume ebi, kudi civuba anu cimwepele muntwamu cìdì cidyànjila-kulongolola bwa kwikalaci ne mwoyi, ne bikwabo byônsò abi nebifwe. Nenku kí ncyá kumpala cìdì cikatuutakeena to; ncyá kumpala cyàsangilà ne diyi aci. Pàmwăpa diyi adi didi mwa kubànda dyumukila paanyima paa bilume, anyi munkacinkaci mwa bilume; civuba cidi mwa kwenza paaci bya mwomumwe, diyi. Civuba cidi cidikoka cibwela munda mwa diyi, kadi tuumikila tukese atu tukoseka tùmata, nenku ki dyébà dya mwongu dyabangi adi. Kudi anu cimwepele mu búngì byônsò bùdì bupùmuna, bwa mùliyô mujima abu, ciikalà mwa kufika ku bwalu, anu cimwepele; ne ciine aci ndipàngadika dyangata kùdì Bukole kampanda bwa kabuyi bumanyike, kùdì muntu to. Kadi pààbì’s, muntu ne muntu, nudi bafwanangane, cyônsò cya ku bivuba abi mbifwanangane anu menemene. Ncintu anu cyôcì cimwecimwe aci mu nyama. Ncintu anu cyôcì cimwecimwe aci mu bantu. Ncipàngadika bwa ne neciikalè mwànà wa balume, mwànà wa bakaji, wa nsuki mikunze, wa nsuki mifiike, anyi ní ngwa bishi. Ncipàngadika kùdì Nzambi. Byônsò abi mbifwanangane, mu mubidi emu, kadi kudi cimwepele mwômò amu cìdì cilongolwela mwoyi; cimwepele pa mùliyô mujima, kadi pààbì byônsò abi’s mbifwanangane.

⁵⁴ Pààkuumukà Izaleela mu Ejipitu, kuvwa bantu bìipacila miliyô yibidi mijima bààkuumukà musangu anu umweumwe awu. Yônsò wa kudibo wakumvwa mukenji wa muprofeta awu. Yônsò wa kudibo wakamona Dikunji dya Kapya. Yônsò wa kudibo wakabatijiibwa mu Môsà, mu Mbù Mukunze. Yônsò wa kudibo wakeela mbila mu—mu Nyuma, wàkimba makasa ne wàkanyeema lubilu ùbànda ùpweka kumpenga kwa màyi

aku, pamwe ne Miliyama, pàvwà Mòsà wimba mu Nyuma apu. Bòbò, muntu ne muntu, bààkanwà ku Lubwebwe lumwelumwe lwa nyuma alu. Bòbò, muntu ne muntu, bààkadyà Manà mapyamapya awu diloolo dyònsò. Yònsò wa kudibo! Kadi kuvwa babidi bààkafikà mu buloba abu, umwepele pa mùliyô mujima.

⁵⁵ Diteeta divwa dya bishi? Bònsò bààkanwà ku Lubwebwe lumwelumwe alu, bònsò bààkadyà Manà a nyuma bu mutudi munkaci mwa kudya mu dinda emu emu, kadi diteeta dya Dìyì ndyàkabàjaadikà. Pààkafikà cikondo cya Kaadesa-baanea, dîbà dyakaasabo lwendu bwa kubwela mu buloba bulaya, kadi kabavwa mwa kuya dyamwamwa kabayi banji kubeela ku diteeta dya Dìyì to. Kadi bakwabo bònsò dikumi abu—abu bòbò baakaalukila, kwambabo ne: “Katwena mwa kwangula mpasu to! Bantu abu badi bu. . . Twètù tudi bu mùdì tupasu, kudibo, cimenga cyabo cinene cidì cyela mu bimanu aci. Dikandameena nditambe bunene.”

⁵⁶ Kadi Yosuwa ne Kaaleba baakapuwisha bantu. Kwambabo ne: “Twètù tudi batambe ne bukole bwa kucyenza!” Bwa cinyi? Nzambi uvwa mwambe, kumpala kwa kuumukabo, bwa kuya ku buloba bulaya abu ne: “Ngănùpèèshi buloba abu. Ngănùpèèshibù. Mbwenu nwènù.” Kadi kuvwa umwepele pa mùliyô wònsò.

⁵⁷ Kudi beena Kilisto baa ku dîna pabwîpì ne mìliyô nkama yitaanu pa buloba leelu ewu, ne dituku dyònsò dicyacyà dîlililà edi didi ndekeelu wa lukongo kampanda. Nenku mpindyewu, ambaayi tũng bu Dyambwibwa mwa kwenzeka leelu ewu ne bantu nkama yitaanu, pa buloba bujima, kwangaciibwabo mu Dyambwibwa adi? Kwèna mufwanyineku nansha kumanya anyi mene kumona mu cibebiji ne, mbye to. Ne Dilwa dya Mukalenge n’Dilwa dya mu musokoko. Yèyè nealwe ne neangate bu mùdì mwivi wenza. Nebìikalè bantu banyààbanyà baa menemene, mu mushindu wa ne. . .

⁵⁸ Anu muvwabi mu matuku akakonkabo Yesu kùdì bayiidi ne: “Bwa cinyi Bafundi badi bamba ne—ne Eliya udi ne cya kwanji kulwa dyambedi?”

KwambaYe ne: “Ûkaadi mumane kulwa, kadi kanuvwa bacimanye to.”

⁵⁹ Nukaavwaku beele meeji bwa cyàkenzà bantu anyi? Bòbò baakatungunuka anu ne kwitabuujja ne Maala- . . . ne Maal- . . . Eliya uvwa ne cya kulwa. Pende’s ùvwa munkaci mwabo mene amu, kadi bòbò kabaakacimanya to.

⁶⁰ Ki mwikalàbi kabidi ku dilwa dya Mwânà wa muntu! Bòbò nebènzè Nende anu cintu cimwecimwe aci. Nyuma wa Nzambi’s udi kaaba aka. Ee, citwikalà mwa kwenza Nende ncinyi? Netwikalè mwa kudya Manà, ne bikwabo, kadi katuyi mwa kutungunuka ne kuya kumpala patudi twenda tukola apa anyi?

61 Nukaadiku bamone dimiinu, mùvwà Révérend Pitts wamba katanci aka, mushindu ùdi dimiinu diya mu buloba awu anyi? Mamiinu àbûngì adi mu buloba amu. Pàvwà Nzambi unyunguluka pamutu paa mâyi apu, pamwe ne Bukênkè, ne Bukênkè bwakato lwesha, Bwikadi bwa kumpala bwa Nzambi, Bukênkè bwakula bwakalwa ku Dîyi dya Nzambi. Ne Dîyi dya Nzambi ki cintu cimwepele cìcìdi anu citwala Bukênkè. Kadi pàakaalukilà mâyi paanyima, dimiinu dikaavwa anu mu buloba amu, ne Bukênkè bwakato lwesha anu mamiinu àvwà mashaale ne mutoloku munda mwawu awu, kutolakawu. Nzambi munkaci mwa kwenza bufuki Bwende.

62 Nenu mpindyewu, mu dinda dya Paasaka kwakalwa Bukênkè bukwabo bwàkatuutà pa buloba, pàakafidiibwà Nyuma Mwîmpè. Ne Yêyè mmufidiibwe bwa kutwala Bukênkè kùdi Mamiinu àvwà Nzambi, ku didyanjila-kumanya Dyende, mumanye ne àvwà mwa kwikalaku panu pa buloba. Mwakamanya Ye dimiinu dya kumpala dya mu mubidi amu, Yêyè mmumanye mwaba ùdi Dimiinu dya nyuma disanganyiibwa. Mubidi webe uvwa usanganyiibwa anu mwaba ewu pa buloba anu mwine musangu awu, pàakapàtulà Nzambi buloba bwa kwikalabu kwòkò ku cibangidilu apu. Twètù tudi citupa cya buloba. Tuvwa tusanganyiibwa mwaba awu. Ne ku didyanjila-kumanya Dyende Yêyè uvwa mumanye anu menemene ne uvwa mwa kuMunanga nganyi ne uvwa mwa kuMukwacila mudimu nganyi, ne uvwa mwa kubenga nganyi. Didyanjila-kumanya Dyende ndìdi dyamba aci. Dyòdi kadiyi dyamba to, dìbà adi Yêyè kèna Nzambi nansha. Yêyè kèna mwa kwikala Nzambi ùpanga kwikala kayi ne mikalu to. Nenu pìikalàYe kayi ne mikalu to, Yêyè mmumanye bintu byònsò.

63 Pa nanku, nudi numona mùdi bantu benza bilema byabo bya dikutakana abi. Badi bóbò balendukilapu. Badi banyeemenaku lubilu, ne badyambidila *bikampanda* ne *bikansanga*, kadi kabiyi byenda bìmpè to, twètù tucimona. Kadi cintu cìdi cyenda bìmpè, nkupeta diswa dipwangane dya Nzambi ne kwimanyinamu, cìdi Nzambi mukubiikidile.

64 Anu mwāmbì Mwaneetu Jack katanci aka bwa mwab'ewu ku—ku Pershing Square eku, cibwejàkàjì cyònsò aci. Ewu uya *nunku*, ne ewu uya *naka*; ne pa bìdi bìtàngilà beena teoloji, ne bikwabo, pawikalà muswe kumanya ndambu wa teoloji, pweka kuntwaku.

65 Ngeela meeji ne bidi anu mùdìbi mu Hyde Park mu Londres. Mvwa muyeku, muntu ne muntu mwikàle ne wende mmwenenu wa sungasunga. Cidi—cidi ncinkùtunkùtu mùyòmbelè cya bantu baa cyena lelu mu Babulona.

66 Kadi nuvwaku bamone mùvwà—mùvwà Mwaneetu Pitts mutungunuke ne diyishi dyende adi bulengadi dyàtuyiishiye mu dinda emu amu anyi? Mmwenze anu ubanga kupatuka mu

cisuku cya dilamina nyama aci, ki kupetaye mwaba awu cilòngò cikese cya mbata wa Paasaka. “Munkaci mwa cibwejàkàjì cyònsò aci,” muvwaye ututwadilaci, “kacivwa ne mushindu wa kwambaci ‘eyowa’ anyi ‘to’ to. Civwa mmwoyi kampanda wa Nzambi ukenka munda mwaci amu, munkaci mwa cibwejàkàjì cyònsò aci.” Civwa mwaba awu mu bukênkè bwàci abu, bwalu Nzambi uvwa mulongolole bwa kwikalaci mwaba awu. Munkaci mwa mvita yònsò ayi, muntu nansha umwe kavwa ucimonaku to. Kabavwa bamona ngangacilu waci wa mu nyuma awu to.

⁶⁷ Nenu ki mùdìbi kabidi leelu ewu munkaci mwa masangisha etu ne bisumbu byònsò bya binene ebi, ne maekeleeziya ne mangumba, ne bikwabo. Ewu ukokelangana mu *nunku* ne: “Tudi ne cya kwikala ba-Baptistes, anyi kwikala ba-Presbytériens, tudi ne cya kwikala *cikampanda*, *cikansanga*, anyi *cikankenga*.” Munkaci mwa biine byònsò abi, kudi cilòngò ciikàle citoloka. Kudi bukole kampanda bwa Nzambi anu munkaci mwetu mene, munkaci mwa kubàndishiibwa anu kuulu munkaci mwetu twètù bònsò. Twànjààyi kwimana bwa twètù kubùbandila, mu tusunsa tukese cyanaana, ne tùbùbandilè mu lumingu elu, ne tubumone budivungulula anu kumpala kwetu mene. Tudi twitabuuja ne Nzambi neàcyènzè. Kanwena nwènù nwitabuuja nanku anyi? [Disangisha didi dyamba ne: “Amen.”—Muf.]

⁶⁸ Ndi mmona ne bivwa bikengela twètù kwikadila mu nzubu wa panshi bwa mpindyewu. Pa nanku, tusambilaayi, muntu ne muntu wa kutudi.

⁶⁹ Nzambi munanga, patudi twinyika mitu yetu mu Bwikadi Bwebe, tudi tudyumvwa ne tudi bapange bikole dikumbanyina bwa kulomba. Kadi Wèwè utu mutulaye ne, twètù mwa kulwa, Wèwè kwèna mufwanyine kutubengela nansha. Kadi mèyi a kaàyi mapilula àdì àfùma ku dyambiibwa aa, nansha bishi kî mbwa kwikalaci dilongesha dya nshindameenu to, ne “umwepele pa mùliyò mujima,” kadi cidi anu mbwa kuvuluka cyanaana. Bwalu Wèwè wàkamba ne:

...mushiku wa mbelu mmubumbakane, ne njila mmubulakane, udi ufila ku mwoyi, ne nekwikalè bakese biikalà mwa kumupeta.

Bwalu babìkila mbavule, kadi basungula mbakese.

⁷⁰ Éyi Taatù wa Cyendelele, tumaku Bukênkè bwa Evanjeeliyo bwa kukosololabu cimenga eci, mu lumingu lujima lùlwalwà lwa mpungilu elu. Ne piikalàku Dimiinu kampanda, mu mushindu kampanda ku bulongolodi Bwebe Wèwè mwine bunene, bwa lungenyi abu, byenze bu mùdi kuteeta kubuumvwijila ku bilume bya mulume ne mukaji, swaku bwa balwe benda babunguluka bakabwele too ne mu mpungilu amu. Swaku bwa Nyuma Mwimpè abapeeshe Bukênkè. Tudi tufika ku dyumvwa ne dîbà pàmwàpa dikaadi diye kupita ne mutudi twètù twela meeji. Tudi tulomba, Nzambi, ne bu mutudi balwe mwab’ewu, biitabuuje

anu cyanaana ne pàmwápa kudi cintu kampanda mwab'ewu cidi cifwanyine kwenjiibwa ne cifwanyine kwambulwishaku bantu, anyi—anyi kubakulaku mukooko wa ndekeelu awu. Tudi bamanye ne, piikalà cikumbi cya mikooko cyùle, díbà adi Mulami wa mikooko neakange ciibi.

71 Anu mwakadibi mu matuku a Noa, pààkabwejiibwà cidimba cya ndekeelu cya famiye, Nzambi wakakanga ciibi. Nenukù bôbô kukookola ne kutuuta bintu, kadi díbà dikaavwa dimane kupita. Nzambi munanga, bôbô abu's bavwa bapeteku mpunga.

Wêwè utu mwambe ne: “Mêmè ndi Ciibi cya cikumbi cya mikooko aci.”

72 Ne mushindu mwine ùdi musambu wa mwedi wa kasala ewu ukoka ntema ne: “Makumi citeema ne citeema kí mmakumbane Bwebe Wêwè anyi? Kadi, to, kùcivwa mukwabo umwepele.” Mmufwanyine kwikala mukooko mukese wa bafiike, anyi mmufwanyine kwikala kaamuntu cyanaana, mmufwanyine kwikala mukaji mutekete anyi mulume mutekete. Katwena bamanye ne mpenyi padiye usanganyiibwa to, kadi yêyè wa ndekeelu awu udi ne cya kubwela ne pashiishe ciibi necikangiibwe. Éyi Nzambi wa yaaya, Wêwè udi mumanye maalù ònsò awu, kenketaku nsòmbelu yetu mu dinda emu. Ne ututumeku kwònsò kutudi bafwanyine kuya aku, bwa twamona mwa kupeta wa ndekeelu awu, bwa ciibi cyamona mwa kukangiibwa ne Mulami wa mikooko mwikàle usanganyiibwa munda pamwe ne mikooko. Enzaku nanku, Mukalenge. Byòbì ne yêyè awu udi kaaba aka leelu ewu, yêyè udi ne cya kubwela awu piikalàye. . .

73 “Bònsò bàdi Taatù muMpeeshe nebalwe Kùndì. Ne muntu nansha umwe kèna mwa kulwa to, pàdi Taatù Wanyi kayi mumukoke.”

74 Nenukù kwòkò kwikàle dikokiibwa, anyi ndambu wa njiyà, ya ne edi ndidì difwanyine kwikala díbà adi bwa muntu kampanda kaaba aka mu bateeleji aba, kaaba aka anyi mu nzubu wa panshi, anyi ní mpenyi pònsò padiye mwa kwikala, swaku yêyè andamune ne: “Eyowa's, Mukalenge, mêmè ki mukooko mukese ùdi ùlalakana ùvwa mulaluke awu; ne wùtù muCilwisheshe awu, munda mwa matuku aanyi ònsò a mwoyi. Ndi—ndi—ndi muumvwe ne bivwa bikengela ndwe, kadi leelu ewu nyewu ndi mukùlame ku luseke lwa dicimunyiibwa. Ncyèna mwa kubànda anyi kupweka to. Ncyènakù mwa kulonda njila nansha umwe to.” Kaa, swaku bwa Mulami munene wa mikooko alwe, olole byanza bya dinanga abi ne aluje yêyè awu mu dikubiibwa dyònsò, amuteeke pa makaaya Ende ne amwaluje mwikàle mu dikubiibwa dyònsò.

75 Pàmwápa kùdikù umwe kaaba aka, Mukalenge, mwikàle ùsaama, ùsanganyiibwa mu ngiikadilu wa bwena wende, udi ngangabuka mwambe ne: “Kakucyena cintu nansha cimwe

cìdì mwa kwenjiibwa to.” Mmuteete kwenza ne mwende mwônsò bwa kuwusungila, kadi kayi mwa kuwusungila to. S’mbimupicile pende. Kakwena—kakwena cintu nansha cimwe cidiye mwa kwenza to. Bwanga bwende bwa lwondopu anyi keele kende kaa dipandangana naaku kabyenaku mwa kufika kudiwu to. Kadi, Éyì Mukalenge, kakwenaku cintu nansha cimwe cìdì kule kwa ntanta wa mutambe diboko Dyebe dinene adi bule to, ne Dìyì Dyebe’s ki diboko Dyebe diine. Pa nanku tudi tulomba, Nzambi Munanga, ne, mu dinda emu, patucidi twakula Neebe apa, bwa Wêwê kwolola cianza ne kwambula ùdì ùsaamà ne kawuyi mwa kudyambulwisha wôwò mwine awu, mu mwaba ùdì maalu ônsò a mamanya kaàyi mwa kufika, kule ne ngangabuka, swaku bwa kwondopiibwawu. Enzaku nanku, Mukalenge.

⁷⁶ Patudi tuvuluka Davidi apa, muvwaye mupeeshiibwe bujitu pa ndambu mukese wa mikooko, anu mikese menemene. Kadi dîngà dituku ours kulwaye ne kwangataye mukooko mukese awu ne kuyaye naawu, ne ùvwa mufwanyine kwikala muwudye (bu mùdì kansere kafwanyine kudya mubidi kampanda’s), anyi nyama wa ntambwe munenaanenaale. Kadi Davidi, kayi mudipaye bîmpè bya menemene ne—ne cingoma to, anyi, kayi mulwanganyi wa ne mwele wa mvita to, kadi mwikàle anu ne ndundu wa nyuunyi cyanaana, kulondaye mukooko awu. Nenku paakapetaye nyama ukààvwa pabwîpi ne—ne kushipa mukooko mukese awu, kumushipaye ne ndundu wa nyuunyi awu. Kaacintu kaa dilwa naaku mvita anu kakese kapeepele naka kiikàle ne kapese kaa ciseba ne mulemu cyanaana, ne, kadi yêyè uvwa ne dyeyemena ku kòkò aku.

⁷⁷ Twêtù katwenaku ne kampanda wa meeji a mapitepite munkaci mwetu to, Mukalenge. Tudi bantu bapwekele biikàle ne disambila dikese dipwekele, kadi tudi tulwa mu dinda emu twenda tulonda mukooko wa Taatù. Mukaji udi mwende misèèsù ne misèèsù wawa, mukwate ne bya luse, wenda unwa mfwanka, ukeba kupetela ditalala ku mfwanka; muntu mulume udi mununkile cilawudi ne muteete bwa kucyaluja pa meesa wawa, kadi mulwishi nyawu kacya anu wamukwata bikole; nsongaalume anyi nsongaakaji udi muteete bwa kwenzaku cìdì cîmpè wawa, udi kayi anu mwa kupeta dikanda dya kusuuluka ku cintu cibi aci awu; nyewu tulwa mu Dînà dya Mukalenge Yesu, bwa kunana mukooko awu mu dinda emu. Tudi twela mwena lukuna awu kadyombo; bwalu nkaacintu kapeepele, ndundu wa nyuunyi, disambila, kadi tudi tulwa bwa kumwaluja mu lupangu lwa Taatù, bwa twamona mwa kufila mulubu wa biine bintu abi bidì bifidiibwe mu cianza cyetu. Swaku bwa bukole bwa Nzambi bùkalengè mpindyewu diitabuuja, munda mwa myoyi ya bantu, ne swaku bwa musuuka ùdì mujimine awu walukile mu dinda emu. Swaku bwa mateeta a mwoyi wa panu amulekelele, amulekele aye. Ne swaku adimone yêyè

mwine mu dikubiibwa pa makaaya a Mfumwende, munkaci mwa kwalujiibwa cyakabidi ku dikubiibwa. Tudi tulomba nunku mu Dìna dya Yesu. Amen.

⁷⁸ Nzambi anubeneshe bônso. Too ne pângàànùmònà maalaba, ndi ngaalujila Mwaneetu Shakarian bulombodi bwa disangisha. [Katupa kaa mukaba wa mèyi munda mutupu—Muf.]

[Mwaneetu Branham udi ujikija citupa ciisâtù—Muf.]

☆☆☆☆☆☆

⁷⁹ Eci, ndi—ndi mutekemene ne nenwikalè. . . ne ndi mupete ndambu mukwabo wa ngàsà ku mèsù kwa Nzambi ne kumpala kwenu nwênù, mu mushindu wà kanùyì mwa kwitabuujà ne mèmè ndi mufwanyine kwimana kaaba aka bwa kunwambila cintu kampanda cya mafi. Ngkùmngaji mufikilu wa dilediibwa dyanyi wa bidimu makumi ataanu ne bisambombo, dituku adi. Eci kî m'Mukenji naka wa muntu kampanda mukulakaji to. Ndi ngitabuujà cyôci eci kacya anu pâncivwa mwànà mutekete. Ne cyôci eci piikalâci kaciyi cilelela to, mèmè kadi ki muntu mutambe kukutakana ukaadiku Nzambi mupete pa buloba. Ntu mufile mwoyi wanyi wônso ku Bwalu ebu. Nenku swayi ngâmbèku bwalu ebu ne meeji matooke ônsò ne: bu ne mvwaku ne myoyi binunu dikumi ya kulaala panu, mèmè ncivwaku mufwanyine kushintulula mmwenenu wanyi to.

⁸⁰ Mpindyewu, dyondopiibwa didi dya muntu yônso wolola cyana upeta. Vulukaayi ne, dyondopiibwa didi mu wêwè amu. Nzambi wakateeka mu mucu wa pêches cimuna ne cimuna cyônso cya pêche civwâku cifwanyine kwikala mu mucu awu aci, paakawukunaYe mu Budimi apu. Nwamonu's, wêwè udi anu . . . mucu wa pêches anyi mucu wa pommes, anyi mucu wa bimuma, bidi bikengela anu bwa kukolawu cyanaana, ku dinwa dya mâyi mu buloba. Mpindyewu yônso wa kunudi udi ne makumbanyina awu mu wêwè amu, bwa kukusungila, bwalu cidid n'Nzambi, kacya anu pawakakunyiibwa mu Kilisto ku dibatiiza apu (kî ndibatiiza dya mu mâyi to), dibatiiza dya mu nyuma. Kwêna ubwela munda mwa Kilisto ku dibatiiza dya mu mâyi to. Nku dibatiiza dya mu nyuma!

⁸¹ Maalaba mu mapingaja, bu Mukalenge mwa kwanyisha, nêngiikalè mwa kwakula pa cyôci aci, *munyi* ne *cinyi* cidid ngangâcilù waCi mulelela. Netwikalè naaci mu mapingaja mu mushindu wa kaciyi mwa kupangisha nansha dimwe dya ku masangisha enu to.

⁸² Mpindyewu tangilaayi, yônso wa kunudi mwab'ewu nudi biimane bu beena kwitabuujà, nwamonu's, dibà adi Mwoyi wùwà munda mwa Kilisto awu udi munda mwebe amu. Wùdi mwa, bu nanshà ne uvwa mufwanyine kucimona!

⁸³ Mudimu wa dyabulu ngwa kushaala kacya wakupangisha Cyôci aci, kukulama mufofomijiibwe. Yèyè udi anu mwa kukulekela mufofomijiibwe, mbwena kwamba ne, nwamonu's,

kuyi umanya ne kúyaayà díbà adi nkwèpi to. Muntu udi mpofò kèna ne mushindu wà kumanya ne kuyaayaye nkwèpi to, bidi bikengela akebele dyumvwa kùdi muntu kampanda udi mwa kumona awu. Patudi katuyi mwa kuumvwa to, bidi bikengela bwa muntu kampanda àtwámбилè cidi Bulelela.

⁸⁴ Nenku Kilisto wakakufwila wèwè, nenku mbakutentule bakuumushe pa buloba bakubweje mu Kilisto. Ne byònsò byúdi naabi dijinga bidi anu mu wèwè amu, ku dibatiiza dya Nyuma Mwímpè. Kí ncyà bushuwa anyi? Mpindyewu cintu cimwepele cidi cikèngelà bwa wèwè kwenza cidi anu kubanga kunwina ku Cyôci aci.

⁸⁵ Nenku anu mùtù mucì wùnwa amu, ùdi ùbanga kupatula mabeji àwù, ntonga yàwù ayi, ùkwàma bimuma byawu ku cidimu ne ku cidimu cyònsò. Cimuma kacitu mu buloba to; cimuma citu mu cikunyiibwa. Mbanganyi bàdi bumvwa aci, bãmbè “amen.” [Disangisha didi dyamba ne: “Amen.”—Muf.] Pa nanku, nwamonu’s, cimuma citu mu cikunyiibwa, ne bidi bikengela bwa cikunyiibwa ne cikunyiibwa cyònsò kunwinaci ku mushimi waci. Pàdi mvula umata, ùdi upeesha cikunyiibwa aci, mwoyi, bwa cyôci kunwinaku. Nenku, pàdici cinwa apu, cidi cikola.

⁸⁶ Nenku cidi cyenda cikola too ne pàdici cikafika ku lutonga lwa lupwile, anu mùdi Ekeleeziya mukafike, bwa kwela bilòngò mu cikondo eci emu.

⁸⁷ Nenku, patudi tunwa, tudi tukola. Kadi cikunyiibwa cyôci cibenge kunwa, díbà adi cikunyiibwa aci kaciyena mwa kukola to. Nenku bu wèwè mwa kuciitabuuja anu cyanaana mpindyewu, wèwè paa nkaayeebe!

⁸⁸ Mu bushuwa bwa bwalu, nwènù nudi bamanye mùdi Mukalenge wenza, ùleeja bintu bishiileshiilangane, bya binùdi benze ne bìvwà kabiyi bikengela bwa nwènù kwikala benze to, ne bikwabo, mu disangisha. Tuvwa batekemene ne Nyuma Mwímpè uvwa mufwanyine kupona pambidi peetu mu dinda emu ne kwenza bya nanku awu, patuvwa biimane apu. Kadi mvwa mutungunuke anu ne kwindila.

⁸⁹ Ngeela meeji ne ki luseke lwa lunyungululangana mutu ndwòlò alu, pa kwela meeji ne mu nzubu wa panshi mbaswe bwa twètù kupatuka mwaba ewu, nwamonu’s. Kadi’s ki cidìbo baswe bwa twètù kwenza; díbà dikaadi mpindyewu dimane kupita.

⁹⁰ Kadi itabuujaayi eci, ne mwoyi wenu wònsò. Bu nwènù mwa kuswa itabuujaayi. Pìikalàbi ne ndiku—pìikalàbi ne ndiku mupete ngàsà ku mèsù kwenu, bu muntu mwambi wa bulelela, itabuujaayi eci. Mpindyewu tentekelanganaayi byanza muntu ne—ne mukwende.

⁹¹ Mpindyewu tangilaayi, mpindyewu, Bible kàtukù mwambe ne: “Bimanyinu ebi nebifile William Branham” to. Kí mmwambe


ne: “Nebifile Oral Roberts nkaayende” to. Kî mmwambe ne nebifile “Mwaneetu Kopp” anyi “muntu kampanda” to.

⁹² “Bimanyinu ebi nebifile bàdì,” ku bûngì, “biitabuuja. Bôbò batentekele babeedi byanza, babeedi nebasangale.” Mbukole bwa Nzambi abu bùdì munda mwebe, bùdì butwadila muntu ûdì mutentekele cyanza awu Mwoyi, mushimi wa Nyuma Mwîmpè ûdì ùfila Mwoyi.

⁹³ Nzambi munanga, mu Dîná dya Yesu Kilisto, mu dibà dya ntape nkutape edi didì ekeleeziya . . .swaku bwa biïmanè mu kasunsukila kaa kasunsa aka, kabayi ne mutu ubanyunguluka to, ne swaku bwa Bukole bwàkajuulà Kilisto mu lukita abu, anu patudi twakulangana apa bubavwijile ne mwoyi Bulelela bwa Evanjeeliyo ne, mudimu wàkatùmanganà naawu Yesu awu uvwa ne, bôbò “batentekele babeedi byanza, babeedi nebasangale.” Swaku bwa bukole bwônsò bwa démon, bubeedi bwônsò, disaamà dyônsò, lutatu lwônsò, cintu cyônsò cìdì citacisha ne cyenzèkèle bantu aba aci, swaku bwa cyumuke anu patudi twakulangana apa ku diitabuuja. Twêtù bu bantu beena kwitabuuja, tudi tucilomba mu Dîná dya Yesu Kilisto. Amen.

⁹⁴ Mpindyewu elaayi byanza byenu muulu nuMupe butumbi, panwikalà nwitabuuja ne Yêyè udi ucyenza.

⁹⁵ Nzambi munanga, mwânà wa mu diboko ewu neafwe, Mukalenge, cyôci eci kaciyi cyenjiibwe. Ndi mpiisha dikayabala edi, mu Dîná dya Yesu Kilisto. Swaku bwa dyumuke kùdì mwânà udi kayi ne bwalu budiye mwenze ewu. Amen.

Mpindyewu, bangangabuka mbateete, kadi bapangile. Itabuuja anu cyanaana. 

UMWÈPELÈ PA MÙLIYÒ MUJIMÀ LUA65-0424

(One In A Million)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo mu dinda, mu matuku 24 a ngondo mwinâyì, cidimu cya 1965, bwa didya dya dinda dya Bwobumwe bwa Buloba bujima bwa Beena Kantu-ku-byanza baa Evanjeeliyo mu Kaabujima ku Clifton's Cafeteria mu Los Angeles, Californie, U.S.A. Ndyumusha pa mukaba wa mêyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org